



Broj: 01/1-02-3269/17
Breza, 27.12.2017. godine

ZAPISNIK

sa DVANAESTE REDOVNE SJEDNICE Općinskog vijeća održane dana 29.11.2017. godine sa početkom u 16,30 sati u prostorijama Općine Breza-Sala Općinskog vijeća.

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 21 vijećnik.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Meliha Beširević, Smajila Omerhodžić, Salih Hasanspahić, općinski pravobranilac Dženana Telalović, savjetnik općinskog načelnika Mustafić Eldin, predsjednik Odbora za provedbu Etičkog kodeksa, predstavnici i članovi političkih stranaka, predstavnik federalne Komisije za ceste Adnan Alikadić, i predstavnici medija.

Predsjedavajući Općinskog vijeća Jusić Vedad upoznao je vijećnike da je održan sastanak predsjednika klubova parlamentarnih stranaka, te da je zapisnik o istom dostavljen u materijalima, informacija o radu Komisije za praćenje i vršenje kontrole nad ulaganjima Korisnika SRC „ADA“ Breza „EKO KRUG“ d.o.o Breza, odgovor na vijećničko pitanje, mišljenja Komisije za statut i propise i Komisije za Budžet i finansije. Također su dostavljene i inicijative koje se odnose na prekategoriizaciju lokalne ceste Visoko-Gračanica-Prhinje-Breza u regionalnu cestu II reda i na zadržavanje postojeće kategorije magistralne ceste II reda M214 Ribnica- Podkamensko-Vareš-Breza-Podlugovi.

Zatim se prešlo na razmatranje Zapisnika sa 11. redovne sjednice Općinskog vijeća Breza. Primjedbi na zapisnik nije bilo, te je isti nakon glasanja usvojen jednoglasno sa 21 glas ZA, bez protiv i suzdržanih glasova.

Potom se pristupilo razmatranju Zapisnika sa održane tematske sjednice .

Primjedbu na zapisnik dao je vijećnik Bajrić Fetah koji je zatražio da se na strani 4. Zapisnika, u predzadnjem pasusu riječ „plati“ zamijeni sa riječju „angažuje“.

Primjedbu na zapisnik je imao i vijećnik Buljetović Ćamil. Traži da se u dijelu koji se odnosi na odgovor na upit općinskog načelnika po čemu smatra da je Izvještaj o izvršavanju budžeta nezakonit i netransparentan, odgovorio je „da to pokazuje sam revizorski izvještaj koji je jasno i decidno pokazao način trošenja budžetskih sredstava, te da je općinski načelnik na predizbornim skupovima upotrebljavao riječi da je budžet nezakonit i netransparentan“.

Nakon toga Zapisnik sa tematske sjednice sa datim primjedbama usvojenje jednoglasno sa 21 glas ZA, bez protiv i suzdržanig glasova.

Zatim se prešlo na odgovorima na vijećnička pitanja.

Vijećnica Jekalović Amina istakla je da nije dobila odgovor na postavljeno vijećničko pitanje koje se odnosi na isplatu stipendija nadarenim studentima, da li su iste isplaćene i kada će biti? Te traži odgovor na narednoj sjednici Općinskog vijeća.

Vijećnik Avdić Edin uputio je kritiku na odgovor na vijećničko pitanje upućeno JKP Breza

- Zašto imamo redukciju vode i šta je uzrok?
- Da li je JP Komunalno.d.o.o Breza spremno za zimsko održavanje puteva?

Zašto u odgovoru nije navedeno pitanje na koje se odnosi odgovor, kako bi vijećnici mogli kvalitetno učestvovati u raspravi. Istakao je da je kriminal uzeti kredit od 5 miliona, bez pribavljene Fezibiliti studije koji služi kao polazna tačka za odlučivanje o početku realizacije ideje/projekta, i uložiti u primarnu vodovodnu mrežu umjesto u sekundarnu. Traži da se pokrene pitanje odgovornosti.

Vijećnik Bajrić Fetah istakao je da nije dobio odgovor na vijećničko pitanje ko je odgovoran za negativan revizorski izvještaj te da li je pokrenuto pitanje odgovornosti.

Zatim se prešlo na postavljanje novih vijećničkih pitanja.

- Vijećnik Bajrić Fetah pokrenuo je dvije vijećničke inicijative koje se odnose na pokretanje aktivnosti na iznalaženju lokacije za gradsko groblje, i lokacije za izgradnju poslovne zgrade i sjedišta JKP Breza, kako bi se u budžetu za 2018.godinu predvidjela sredstva za eventualnu kupovinu lokacija.

Vijećnik Muratović Asim zatražio je odgovor na pitanje koliko je konvertibilnih maraka iz Budžeta općine Breza prebačeno fudbalsim klubovima „Mladost“ i „Rudar“ u periodu 2009 – 2012.

Vijećnik Avdić Edin predlaže da se prilikom izrade Programa rada Općinskog vijeća Breza za 2018.godinu predvite i tačke:

- Plan i program javnih nabavki za 2018.godinu
- Informacija o realizaciji javnih nabavki (2x godišnje):
 - naziv subjekta
 - datum realizacije ugovora sa svim neksima ugovora
 - finansijska vrijednost i ostalo

Da to budu posebne tačka na sjednicama Općinskog vijeća Breza, na kojoj bi se razmatrala Informacija o realizaciji javnih nabavki.

Vijećnik Sirotanović Arif pokrenuo je inicijativu da općinski načelnik primi trenera Alajmović Amara i takmičara Abdulahović Arnela zbog osvajanja zlatne medalje na Svjetskom prvenstvu za kadete u karateu.

- Postavio je vijećničko pitanje o mogućnosti sanacije udarnih rupa na putu Bulbulušići – Orahovo i Slivno – Orahovo.

Zatim se pristupilo utvrđivanju dnevnog reda

Predsjedavajući Općinskog vijeća predložio je da se dnevni red sjednice proširi sa tačkom:

Razmatranje inicijativa i zauzimanje stava po istim

- Zadržavanje postojeće kategorije magistralne ceste II reda M214 Ribnica-Podkamensko-Vareš-Breza-Podlugovi.
- Prekategorizaciju lokalne ceste Visoko-Gračanica-Prhinje-Breza u regionalnu cestu II reda.

Nakon provedenog postupka glasanja konstatovano je da se dnevni red proširiti sa predloženom tačkom , te da će se ista razmatrati kao prva tačka dnevnog reda, što je vijeće usvojilo jednoglasno sa 21 glas ZA, bez protiv i suzdržanih glasova.

Vijećnik Avdić Edin predlaže da se 4. tačka dnevnog reda Izvještaja o izvršenju Budžeta općine Breza za period 01.01.2017.- 30.09.2017. godine razmatra kao 3. tačka

dnevnog reda, prije razmatranja Nacrta Budžeta općine Breza za 2018. godinu i donošenje zaključka po istom.

Nakon provedenog postupka glasanja prijedlog je usvojen sa 21 glas ZA.

Nakon toga, predsjedavajući Općinskog vijeća dao je na glasanje prijedlog dnevnog reda sa datim izmjenama, te je sa jednoglasno sa 21 glas ZA usvojen sljedeći:

D N E V N I R E D

1. Razmatranje inicijativa i donošenje zaključaka po istim.:
 - a) Zadržavanje postojeće kategorije magistralne ceste II reda M214 Ribnica-Podkamensko-Vareš-Breza-Podlugovi.
 - b) Prekategorizaciju lokalne ceste Visoko-Gračanica-Prhinje-Breza u regionalnu cestu II reda.
2. Usmena informacija o radu Općinskog načelnika u periodu između dvije sjednice.
3. Razmatranje i usvajanje Izvještaja o izvršenju Budžeta općine Breza za period 01.01.2017.- 30.09.2017. godine
4. Informacija na znanje: Dokument okvirnog Budžeta općine Breza za period 2018.-2020. godine.
5. Razmatranje Nacrta Budžeta općine Breza za 2018. godinu i donošenje zaključka po istom
6. Razmatranje i usvajanje prijedloga Odluke o usklađivanju statusa Javnog preduzeća „Komunalno“ d.o.o. Breza sa Zakonom o javnim preduzećima u FBiH i Zakonom o privrednim društvima u FBiH.
7. Razmatranje i usvajanje prijedloga Odluke o usvajanju Programa kapitalnih investicija.
8. Razmatranje i usvajanje prijedloga Odluke o davanju saglasnosti na realizaciju projekta „Ojačanje mosta na rijeci Stavnji u ulici 6. april sa obnovom obalnih stubova i izradom pješačkih staza“.
9. Razmatranje i usvajanje prijedloga Odluke o dodjeli u zakup Sportskog centra „Partizan“..
10. Razmatranje Informacije o pismu namjere za realizaciju investicionog projekta na području općine Breza
11. Razrješenje i imenovanje člana Komisije za mlade i ravnopravnost spolova.
12. Razmatranje Informacije Komisije za praćenje i vršenje kontrole ulaganja u SRC „Ada-Breza“.
13. Razmatranje vijećničke inicijative vijećnika Avdić Edina i zauzimanje stava po istoj.

Ad.1

Razmatranje inicijativa i donošenje zaključaka po istim.

- a) Zadržavanje postojeće kategorije magistralne ceste II reda M214 Ribnica-Podkamensko-Vareš-Breza-Podlugovi.
- b) Prekategorizaciju lokalne ceste Visoko-Gračanica-Prhinje-Breza u regionalnu cestu II reda.

Predsjedavajući Općinskog vijeća, riječ je dao članu Federalne komisije za kategorizaciju cesta na području Federacije, Adnanu Alikadić, koji je vijeće upoznao da je u

toku postupak za kategorizaciju magistralnih i regionalnih cesta na području Federacije BiH. Imajući u vidu činjenicu, geografski položaj općine Breza predlaže Općinskom vijeću da pokrene dvije inicijative a koje se ogledaju u sljedećem:

- Zadržavanje postojeće kategorije magistralne ceste II reda M214 Ribnica-Podkamensko-Vareš-Breza-Podlugovi.
- Prekategorizaciju lokalne ceste Visoko-Gračanica-Prhinje-Breza u regionalnu cestu II reda

Nakon detaljnog obrazloženja predlaže Općinskom vijeću da usvoji zaključak kojim se pokreće inicijativa prema Federalnom ministarstvu prometa i komunikacija koja glasi:

„Traži se od Federalnog ministarstva prometa i komunikacija da u trenutnoj fazi pripreme nove ili izmijene postojeće Odluke o kategorizaciji cesta u autoceste i brze ceste, magistralne ceste i regionalne ceste (Službene novine Federacije BiH, broj:24/14) kao nosioca ovih aktivnosti da magistralna cesta II reda M214 Ribnica-Podkamensko-Vareš-Breza-Podlugovi. „

Predložen je i zaključak kojim se pokreće inicijativa prema Ministarstvu za prostorno uređenje, promet i komunikacije i zaštitu okolice Zeničko-dobojskog kantona koja glasi:

„Traži se od Ministarstva za prostorno uređenje, promet i komunikacije i zaštitu okolice Zeničko-dobojskog kantona da u trenutnoj fazi pripreme nove ili izmijene postojeće Odluke o kategorizaciji cesta u autoceste i brze ceste, magistralne ceste i regionalne ceste (Službene novine Federacije BiH, broj:24/14) predloži Federalnom ministarstvu prometa i komunikacija kao nosiocu ovih aktivnosti da se postojeća lokalna cesta Visoko-Gračanica-Prhinje-Breza prekategorije u cestu II reda.“

Predsjedavajući Općinskog vijeća dao je na glasanje prijedlog oba zaključka, te je nakon provedenog postupka glasanja konstatovano da su isti usvojeni jednoglasno sa 21 glas ZA, bez protiv i suzdržanih glasova.

Ad.2

Usmena informacija o radu Općinskog načelnika u periodu između dvije sjednice

Općinski načelnik upoznaje vijeće da su u periodu između dvije sjednice vođene aktivnosti na donošenju Okvirnog Budžeta općine Breza za 3 godine, pripremljen je i Nacrt Budžeta općine Breza za 2018.godinu, donesen je i prijedlog Odluke o usvajanju Programa kapitalnih investicija, koji je pripremio Koordinacioni tim za izradu Programa kapitalnih investicija. Kad su u pitanju infrastrukturni projekti u završnoj fazi je i tehnički prijem vodovoda Dadijevac, i rekonstrukcija puta R-444. Nastavljaju se aktivnosti na vodovodu Bukovik te je započeta druga faza radova na potoku Jasike, sanaciji klizišta Opreč, a završeno je i asfaltiranje lokalnog puta u naselju Župča. Na klizište Opreč uveden je izvođač radova a nastavljene su aktivnosti na izradi Strategije razvoja općine Breze za naredni period.

Ad.3

Razmatranje i usvajanje Izvještaja o izvršenju Budžeta općine Breza za period 01.01.2017.- 30.09.2017. godine.

Pomoćnik općinskog načelnika za finansije, Meliha Beširević podsjetila je vijećnike da je Izvršenje Budžeta općine Breza za period 01.01.2017 do 30.09.2017godine zasnovano na Zakonu o Budžetima i Odluci o izvršavanju Budžeta općine Breza za 2017.godinu. Budžet općine Breza za 2017.godinu usvojen je na sjednici općinskog vijeća od 29.03.2017.godine i planiran je u iznosu od 4.600.000 KM.

Ukupan prihod budžeta u periodu od 01.01.2017. – 30.09.2017. ostvaren je u iznosu od 3.505.490,59KM, što je 76,21% planiranih prihoda za 2017.godinu.

Rashodi Budžeta za isti period iznose 2.768.595,89KM, što je 61,52% plana za 2017. godinu.

Procenat izvršenja Budžeta Općine Breza za 9 mjeseci 2017. godine je 126,62% što znači da je ostvaren budžetski suficit od 26,62% ili 736.894,70KM.

Ostvareni suficit je korišten za izmirenje prenesenih obaveza iz ranijeg perioda.

Neizmirene obaveze na dan 30.09.2017.godine iznose 1.584.900KM.

U toku je priprema Programa pokrića ukupnog deficita Budžeta općine Breza u narednih pet godina i izrada Dokumenta za otpis zastarjelih obaveza i potraživanja koja će biti prezentirana.

Predsjednik kluba SDA Mirza Ahmedspahić u ime kluba SDA istakao je da vijećnici SDA neće podržati prijedlog Izvršenja Budžeta općine Breza za prvih 9 mjeseci 2017.godine, shodno mišljenju Komisije za Budžet i finansije. Pohvaljuju prihodovnu stranu Budžeta.

Vijećnik Ćamil Buljetović u ime izvršnog odbora DF istakao je da su i oni na tragu mišljenja koje je dala Komisija za Budžet i finansije, pogotovo zbog negativne stavke potraživanja, i u prvom redu zbog činjenice da stavka za finansiranje sportskih udruženja neće preći ni 50% za 9 mjeseci. Razočaran je posebno ovim stavkama koje se tiču ulaganja u sportska udruženja i sportske klubove.

Vijećnik Kadrić Memsud smatra da je općinski načelnik po pitanju Izvršenja Budžeta općine Breza, uradio dobar posao, obzirom na stanje kakvo je zatečeno prilikom preuzimanja funkcije općinskog načelnika. Ima zamjerku na finansiranje boračkih organizacija, a pogotovo sportskih organizacija. Iz izvještaja se ne vidi finansiranje FK „Rudar“.

Vijećnik Avdić Edin na početku izlaganja dao je svoj zaključak. Bilansa uspjeha izvršenja budžeta za prvih 9 mjeseci 2017.godine je u najvećem dijelu nerealna i netačna, i nije došlo do izvršenja Budžeta kako je predloženo i usvojeno od strane Općinskog vijeća Breza. Kad bi se uradila bilasa uspjeha, kada bi platile sve stavke koje su usvojene od strane Općinskog vijeća, stanje budžeta bilo bi u velikom deficitu bez obzira da su prihodi bili veći za 30% od planiranog. Zatim je izvršio analizu najačih i najvećih stavki iz kojih se vidi da nisu dobro planirane. Veliko prekoračenje vidi se u stavkama za plate i naknade koje će do kraja godine dostići iznos oko 300.000 KM te je vidljivo da se budžetska sredstva umjesto na kapitalne investicije za koje je u proteklom periodu potrošeno 186.000KM troše na plate i naknade i ostale potrebe općine, te da se u općinu ide po funkciju, posao i javni tender umjesto da općina bude servis građana. Iskazani suficit pokazuje neanalitičko planiranje Budžeta i namjerno zavaravanje Općinskog vijeća, jer je isto usvojil Odluke koje se moraju poštovati i izvršavati, obzirom da postoje instrumenti po kojima se radi te prihode i rashode izbalansirati i o istom obavijestiti Općinsko vijeće. Realan suficit je 1,2% ali gledajući po prihodovnoj strani, ali rashodi su i ono što je Općinsko vijeće izgleda da se treba platiti a ne što odredi Općinski načelnik.

Kada je u pitanju pokriće deficita predlaže da se rok od 5 godina smanji na 3 godine s tim da se tačno izračuna i predstavi Općinskom vijeću. Iz izvještaja se vidi da nisu isplaćene subvencije javnim ustanovama kako je planirano u Budžetu za 2017. godinu. Pozitivno je što su izvršene isplate socijalno ugroženim kategorijama, omladini, djeci itd.

Vijećnik Bajrić Fetah istakao je da je prihodovna strana dobra. Slaže se sa mišljenjem Komisije za budžet i finansije. Podsjetio je vijećnike da je na početku godine SDA davala određene primjedbe i sugestije općinskom načelniku, ali iste nisu prihvaćene što je sada došlo do izražaja, te iz tog razloga sada neće podržati izvještaj. Jedna od primjedbi bila je i izdatci za rad organa uprave i broj uposlenika, te je općinski načelnik kao nadležni organ

trebao naći rješenje donoseći novu sistematizaciju što nije učinjeno. Isto tako nije ispoštovana ni isplata poljoprivrednog podsticaja iako je ista u 2017. godini znatno smanjena i rješenja za isplatu stoje u ladicama službenika, bez obzira što je Općinsko vijeće to usvojilo. Nepoštivanje odluka Općinskog vijeća ogleda se i u stavci planiranoj za čišćenje i održavanje grada gdje je planirano da se za te poslove JKP Breza isplati vrijednost oko 260 000 a isplata je do sada iznosila 110.000 , jer pojedini ljudi daju sebi za pravo da odlučuju u mjesto Općinskog vijeća. Kada je u pitanju nastali suficit podržava prethodne diskutante te ističe da je apsurdno da imamo višak novca a nisu isplaćene planirane obaveze. Prihodovna strana je uredna a rashodovna strana je loša i ne može se popraviti na ovaj način.

Općinski načelnik u svom izlaganju pojasnio je da je dolaskom na funkciju zatekao velika dugovanja po pitanju isplate poljoprivrednih podsticaja, naknada za isplatu socijalno ugroženim kategorijama, što je u proteklom periodu isplaćeno, a kada je u pitanju isplata podsticaja isplaćena u 2017.godini ista će se isplatiti kako je i planirano, te nema namjeru ni on ni općinski službenici da zamajavaju Općinsko vijeće. U proteklom periodu vršene su uplate za rad sportskih udruženja i ostalih udruženja. Ulaganja u sport također su vršena, i pokušavalo se da se FK „Rudar“ dovede u pozitivno poslovanje. Smatra da će ulaganja u sport biti izvršena onako kako je planirano u budžetu za 2017.godinu. Kada je u pitanju komunalno preduzeće, općina servisira ranije preuzete obaveze po kreditnom zaduženju. Očekuje se da ove godine komunalno preduzeće pozitivno posluje. Provedena je i finansijska revizija općine Breza za 2016.godinu te je održana i tematska sjednica, te su donesene smjernice za dalji rad. Očekuje da će do kraja godine isplatiti predviđene grantove javnim preduzećima i ustanovama kako je planirano, a biće završene i ulaganja u kapitalne investicije. Smatra da ništa ne krije od Općinskog vijeća i da je sve javno i transparentno .

Vijećnik Bajrić Fetah uputio je repliku na izlaganja općinskog načelnika te tvrdi da poljoprivredni podsticaj za ovu godinu nije isplaćen kako je planiran te traži da se odgovorni za neisplaćivanje podsticaja imenuju i sankcionišu.

Pomoćnik općinskog načelnika Meliha Beširević upoznala je vijećnike da je općina dolaskom nove garniture vlasti bila dužna oko 2.000.000 KM za neizmirene obaveze, što je općinski načelnik u proteklom periodu nastojao da isplati kako općina Breza nebi bila blokirana. U međuvremenu su stigli novi anuiteti za plaćanje a to su sve dugovi od ranijih zaduženja. Isplaćen je poljoprivredni podsticaj za prethodne godine u iznosu od 160 hiljada.

Vijećnik Ahmedspahić Mirza postavio je pitanje:“Šta ste radili prije dolaska načelnika Muniba Zaimovića?”

Vijećnik Kadrić Memsud postavio je pitanje da li općina servisira kredit Komunalnog preduzeća, na šta je pomoćnik općinskog načelnika za finansije pojasnila da općina nije garant i serviser kredita komunalnog preduzeća, nego se obavezala da će uredno plaćati usluge za obavljanje Programa komunalnih usluga zajedničke komunalne potrošnje iz kojih sredstava će komunalno preduzeće servisirati uzeti kredit.

Vijećnica Jekalović Amina istakla je da je izvršni odbor SDP ostati suzdržani, obzirom da su sredstva trošena neravnomjerno i nejednako.

Vijećnik Buljetović Ćamil konstatovao je da će se teško izvršiti ulaganja u sportske aktivnosti u sport, u iznosu 60.000 obzirom da su klubovi već završili ovogodišnju sezonu. Konstatovao je da je ove godine izvršen najmanji iznos ulaganja u sport. Predlaže pomoćnosti da se zakaže tačka dnevnog reda po pitanju sporta.

Vijećnik Bajrić Fetah podsjetio je vijećnike da je općina 07.12.2013..godine dala saglasnost na Odluku o kreditnom zaduženju J.P. „Komunalno“d.o.o. Breza, donešena od strane Skupštine J.P. „Komunalno d. o.o. Breza. Usvojen je i Zaključak u cilju obezbjeđenja uslova za redovno poslovanje preduzeća dok traje kreditno zaduženje gdje se zadužuje Uprava preduzeća da provede određene mjere. Općina Breza se obavezala da će

komunalnom preduzeću redovno mjesečno isplaćivati novčanu naknadu na ime izvršenja Programa obavljanja komunalnih usluga zajedniče komunalne potrošnje od kojih će komunalno preduzeće uplaćivati mjesečnu ratu kredita.

Vijećnik Avdić Edin još jednom konstatuje da Općina Breza nije u suficitu i da općina nije uplaćivala svoje obaveze koje je trebala da isplati.

Učesnika u raspravi više nije bilo pa se pristupilo glasanju za Izvještaj o izvršenju Budžeta općine Breza za period 01.01.2017.- 30.09.2017. godine te je nakon glasanja konstatovano da je isti usvojen sa 11 glasova ZA, 6 suzdržanih i 4 glasa protiv.

Potom je uslijedila pauza od 18:25h – 19:00h

Ad.4

Informacija na znanje: Dokument okvirnog Budžeta općine Breza za period 2018.-2020. godine.

Pomoćnik općinskog načelnika Meliha Beširević pojasnila je da u skladu sa Zakonom o budžetima- proračunima FBiH izrađen je Dokument okvirnog budžeta općine Breza koji je dio pristupa Srednjoročnog okvira rashoda za 2017.-2020.godine, koji izlaže fiskalnu strategiju i budžetske planove za sljedeće tri godine. Ima za cilj da razvije bolju stratešku osnovu za pripremu budžeta, odnosno, predstavlja preliminarni okvir nacrtu budžeta za 2018.godinu te daljnja predviđanja za 2018-2020 god. Ovaj dokument urađen je na bazi mikroekonomskih pokazatelja za period 2015-2020 god na nivou Bosne i Hercegovine koji je izradila direkcija za ekonomsko planiranje Bosne i Hercegovine.

Učesnika u raspravi nije bilo.

Ad.5

Razmatranje i usvajanje Razmatranje nacrtu Budžeta općine Breza za 2018. godinu i donošenje zaključka po istom

Pomoćnik općinskog načelnika Meliha Beširević pojasnila je da je na prijedlog Općinskog načelnika predložen nacrt Budžeta Općine Breza za 2018 godinu. Budžet je plan i procjena godišnjih prihoda i primitaka, te utvrđeni iznos izdataka i drugih plaćanja.

- Prilodi u iznosu od 5.250.000,00 KM.,
- Rashodi u iznosu od 5.050.00 KM.,
- Obaveze po deficitu u iznosu od 150,000,00 KM
- Tekuće rezerve u iznosu od 50,000,00M KM

Obavijestila je vijećnike da će biti provedena javna rasprava sa korisnicima budžeta te da svi zainteresovani koji imaju prijedloge i sugestije da iste iznesu na javnoj raspravi kako bi iste mogli razmatrati i uvrstiti u konačan tekst budžeta za 2018. godinu.

Vijećnik Bajrić Fetah konstatovao je da su plate i naknade planirane za 59 uposlenika , da li je donešen novi pravilnik o sistematizaciji radnih mjesta .

Gospođa Beširević pojasnila je da će vrlo brzo biti potpisana sistematizacija radnih mjesta, uskalđena sa Strategijom razvoja općine Breza koja je trenutno u fazi donošenja, a planira se i formiranje vatrogasne jedinice, te na osnovu toga planiran predloženi broj radnih mjesta a samim tim i visina naknade u Budžetu za 2018.godinu.

Vijećnica Jekalović Amina predlaže da se pojedine stavke jasno razdvoje da bi budžet bio transparentniji, prihodi po MZ-ama jasno razdvoji te da se pojedinačno napiše koliko pripada svakoj MZ pojedinačno. Takođe da se razdvoje prihodi sportskim društvima i ostalih udruženjima ,kako bi jasnije mogli pratiti izvršenje budžeta.

G-đa Beširević pojasnila je da je Općinsko vijeće donijelo kriterije za raspodjelu sredstava za kapitalne investicije, a raspodjelu sredstava sportskim i ostalim udruženjima također će se raspodijeliti prema postojećim kriterijima, a visina sredstava biće poznata kada se odredi ukupna suma predviđenih sredstava.

Vijećnik Bajrić Fetah istakao je da u Budžetu za 2018 godinu nisu planirana sredstva za nastavak izgradnje Centralnog šehidskog spomen obilježja u Brezi, te da se sredstva planiraju i moraju biti na prvom mjestu. Smatra da se u proteklom periodu moglo uraditi okolno uređenje prostora oko spomenika.

Pojašnjeno je da kada je u pitanju nastavak izgradnje Centralnog šehidskog obilježja da još nisu riješeni imovinsko pravni odnosi te da nije izdata građevinska dozvola.

Općinski načelnik pojasnio je da je od strane boračkih udruženja postoji ideja o mogućem preprojektovanju objekta Centralnog šehidskog obilježja, i da sredstva neće biti problem za nastavak izgradnje projekta, a pomoć je obećao i ministar Čolaković.

Vijećnik Bajrić Fetah smatra da je prijedlog za preprojektovanje neozbiljan obzirom da je provedena javna rasprava i da su pravo učesća na istoj imali svi zainteresovani, da je urađena projektna dokumentacija i dio projekta je već realizovan. Insistira da se imovinsko-pravni odnosi što prije riješe te da se u budžetu predvide sredstva za nastavak izgradnje Centralnog šehidskog obilježja, jer iste priče i obećanja slušamo od 2013.godine.

Vijećnik Avdić Edin predlaže da se u nacrtu Budžeta za 2018 godinu isprave sljedeće stavke:

Na strani 13 „Primici od prodaje zemljišta“ gdje je planiran iznos od 200.000KM a izvršeno je u iznosu od 21.049,51KM, što je bilo planirano u 2017.godini a isti prijedlog je i u 2018.godini, i na način na koji će općina povećati vrijednost kapitala.

Također se osvrnuo na stavku regres uposlenicima u 2018.godini koji je u odnosu na 2017. god. povećan u iznosu na 5.450KM obzirom da je broj uposlenika ostao isti, traži da se stavka ispravi, inače neće glasati za isti.

Postavio je pitanje zašto je stavka usluge medija povećana u odnosu na 2017.god. šta je razlog povećanja, a povećane su i naknade za reprezentaciju

Predlaže da ubuduće se organizuje javna rasprava kojoj će prisustvovati vijećnici i predstavnici predlagača sa jasnim prijedlozima i pojašnjenjima.

Za JU Centar za socijalni rad Breza predviđen je iznos 330.000KM, u protekloj godini nije bilo ništa.

Zašto je za izvršenje sudskih presuda i rješenja o izvršenju predviđen iznos od 100.000KM u odnosu na 2017. gdje je utrošeno 1386,90KM.

U nastavku je konstatovano da se radi o iznosu od 10.000KM te da je riječ o tehničkoj grešci.

Također je konstatovao da su iznosi za puteve i mostove, vodovode i kanalizacije u odnosu na cjelokupnu visinu Budžeta za 2018.godinu planirani u veoma malom iznosu, i to 12% po glavi stanovnika, u odnosu na sredstva koja su planirana za plate i naknade. Sredstva za plate i naknade planirana su u visini prošlogodišnjeg, iako već sada znamo da će taj iznos biti znatno veći, čime se svjesno obmanjuje Općinsko vijeće, potom je predsjedavajući općinskog vijeća predložio sljedeći :

9
ZAKLJUČAK

I

UTVRĐUJE SE Nacrt Budžeta Općine Breza za 2018.godinu.

Po utvrđenom Nacrtu Budžeta Općine Breza za 2018.godinu sprovesti javnu raspravu sa vijećnicima (posebno), i sa ostalim korisnicima Budžeta Općine Breza, te sprovesti centralnu javnu raspravu.

II

Javnu raspravu sprovesti u periodu od 29.11.2017. do 20.12.2017. godine

III

Za realizaciju zaključka zadužuje se Općinski načelnik i Služba za finansije, inspeksijske poslove i opću upravu.

Nakon provedenog postupka glasanja, konstatovano je da je zaključak usvojen sa 18 glasova ZA, 3 suzdržana bez, bez glasova protiv.

Ad.6

Razmatranje i usvajanje prijedloga Odluke o usklađivanju statusa Javnog preduzeća „Komunalno“ d.o.o. Breza sa Zakonom o javnim preduzećima u F BiH i zakonom o privrednim društvima u FBiH.

Pomoćnik općinskog načelnika Salih Hasanspahić pojasnio je da se Odluka donosi na osnovu člana 2. Zakona o javnim preduzećima u Federaciji Bosne i Hercegovine, zatim na osnovu odredbi članova 304. stav (2), 306. i 372. Zakona o privrednim društvima Federacije Bosne i Hercegovine (*Službene novine Federacije Bosne i Hercegovine broj 81/15 i člana 19. Stav 1. Tačka 19. Statuta Općine Breza („Službeni glasnik Općine Breza“ – Prečišćeni tekst broj: 8/09)*)

Shodno zakonskim odredbama i odredbama Statuta Općine Breza, općinsko vijeće je nadležno za donošenje ove Odluke. Također je upoznao vijeće o stavu Komisije za statut i propise te je u svojstvu predlagača predložio i sljedeći amandman koji se odnosi na primjenu odredbe člana 12 kao i donošenje provedbenih akata Odluke gdje se obavezuje nadležna služba da će iste da donese u roku od 60 dana od stupanja na snagu ove odluke .

Vijećnica Jekalović Amina u ime kluba vijećnika SDP i DF-a je također dala primjedbu na manjkavost odluke koja se odnosi na osnovni kapital JP član 5. tačka 2.

Predsjedavajući Općinskog vijeća daje na glasanje amandman koji je predložio predlagač

„Odredbe člana 12. Stav 1. Odluke primjenjivati će se nakon donošenja akta iz stava 2. istog člana ove odluke.

Akt iz stava 1. ovog člana donijet će se u roku od 60 dana od dana stupanja na snagu ove Odluke.“

Nakon glasanja konstatovano je da je predloženi amandman usvojen sa 16 glasova ZA, 4 suzdržana, bez glasova protiv.

(Sjednicu vijeća, uz dopuštenje predsjedavajućeg, napustio je vijećnik Salčinović Fikret)

Zatim je na glasanje dat prijedlog amandmana:

„Popis sredstava iz člana 5. tačka 2. izvršiti će se u roku od 60 dana i objavit će se u Službenom Glasniku općine Breza.“, te je nakon glasanja konstatovano da je isti usvojen sa 16 glasova ZA, 3 suzdržana, bez glasova protiv.

Nakon toga pristupilo se glasanju za cjelokupnu odluku sa datim amandmanima, te je konstatovano da je ista usvojena sa 16 glasova ZA, 3 suzdržana, bez glasova protiv.

Ad.7

Razmatranje i usvajanje prijedloga Odluke o usvajanju Programa kapitalnih investicija.

Pomoćnik općinskog načelnika Salih Hasanspahić pojasnio je da se zbog ukazane potrebe koja je rezultat isteka važnosti planskih dokumenata, aktuelnim promjenama na terenu koji su rezultirali uključenjem novih političkih struktura, Općina Breza je u tom smislu pristupila realizaciji ovog modela lokalnog razvoja.

Ovim modelom se omogućava veće učešće javnosti u planiranju i razvoju zajednice odnosno povećanje transparentnosti općinskog planiranja i donošenja odluka. U cilju realizacije ovih nastojanja Općinski načelnik je donio rješenje o imenovanju Koordinacionog tima za izradu Programa kapitalnih investicija. Koordinacioni tim se sastoji od 11. članova koji predstavljaju većinu interesnih grupa sa područja Općine Breza.

Sekretar koordinacionog tima Safet Zahirović pojasnio je da Program kapitalnih investicija zasnovan na načelu da se svi procjenjivani prijedlozi u Općini moraju ocijeniti prema jedinstvenim kriterijima. Javni poziv (medijska kampanja) za apliciranje na projekte oglašen je 12.10.2017. godine.

Plan Programa kapitalnih investicija takođe predstavlja:

- Dvogodišnji program razvoja općine,
- Program progresivnog karaktera, što znači da će nakon realizacije projekta predviđenih za prvu godinu biti dopunjavan projektima za sljedeću godinu.

Vijećnik Bajrić Fetah istakao je da predloženi program ima nedostatke obzirom da ne tretira proširenje gradskog groblja kao i nastavak izgradnje šehidskog obilježja, te je nelogično da uređenje izletišta nosi više bodova od postavljanja rasvjete u naselju Bate. Pojašnjeno je da su pravo na predlaganje projekata imali svi zainteresovani.

Vijećnik Buljetović Ćamil smatra da se pitanje gradskog groblja moglo riješiti i ranije.

Vijećnik Kadrić Memsud pohvalio je prijedlog kapitalnih investicija obzirom da prijedlozi dolaze direktno sa terena.

Predsjedavajući općinskog vijeća pojasnio je da je zadatak komisije da izvrši bodovanje predloženih projekata a nemaju pravo predlaganja projekata, ali postoji mogućnost da se lista projekata mijenja i da se dodaju novi projekti.

Vijećnica Jekalović Amina predlaže da se što više izlazi na teren i da se sa istim upoznaje građani koji imaju pravo predlaganja.

Vijećnik Avdić Edin istakao je da se u Program kapitalnih investicija krenulo bez Plana kapitalnih ulaganja i bez rang liste prioriteta.

Predsjedavajući općinskog vijeća dao je na glasanje Odluku o usvajanju Programa kapitalnih investicija, te je nakon glasanja konstatovano da je isti usvojen sa 19 glasova ZA, i 1 suzdržanim glasom, bez glasova protiv.

Ad.8

Razmatranje i usvajanje prijedloga Odluke o davanju saglasnosti na realizaciju projekta „Ojačanje mosta na rijeci Stavnji u ulici 6. april sa obnovom obalnih stubova i izradom pješačkih staza“.

Služba za privredu kao zakonski upravitelj lokalnih cesta u postupku utvrđivanja stanja lokalnih cesta i objekata na lokalnim cestama, utvrdila je postojeće stanje mosta u ulici 6. april.

Ojačanje mosta se ogleda u obnovi obalnih stubova i krilnih zidova, obnovi kolovozne konstrukcije i izvedbi pješačkih staza obostrano.

Predsjedavajući općinskog vijeća upozna je vijećnike da je došlo do promjene dijela odluke u Članu 2. i 3. te je predložen amandman koji glasi:

Član 2.

Ovlašćuje se Općinski načelnik da zaključi ugovor o finansiranju realizacije projekta iz člana 1. ove Odluke sa donatorom ovog projekta, uz obavezu postavljanja ploče pored objekta sa podacima o donatoru.

Donator projekta Mustafa Šabić, sin Zihnije, nastanjen u ulici 6.april Breza se obavezuje da će u cjelosti finansirati realizaciju projekta iz člana 1. ove Odluke.

Član 3.

Troškove izrade projektne dokumentacije, izdavanje potrebnih dozvola, troškove zaključenja ugovora i nadzora snosi općina Breza.

Nakon datih pojašnjenja pristupilo se glasanju za predloženi amandman, te je nakon glasanja konstatovano da je isti usvojen sa 20 glasova ZA, bez protiv i suzdržanih glasova.

Zatim je sa istim brojem glasova usvojena i predložena odluka sa datim amandmanima.

Usljedila je pauza od 20:30-20:45h

Ad.9

Razmatranje i usvajanje prijedloga Odluke o dodjeli u zakup Sportskog centra „Partizan“.

Pomoćnik općinskog načelnika Smajila Omerhodžić pojasnila je da se udruženje pedagoga tjelesnog odgoja i sporta UPTOS Breza, pismenim putem obratilo službi za prostorno uređenje, zaštitu okoline, geodetske i imovinsko-pravne odnose općine Breza, zahtjevom za dodjelu prostorija u zgradi Partizan u zakup, radi obavljanja sportskih djelatnosti. Naveli su da egzistiraju od 2008.god i da rade veliki broj projekata iz oblasti sporta i da su im neophodne odgovarajuće prostorije kako bi imali uslove za svoj rad. Obzirom da je sportski centar Partizan trenutno bez ovlaštenog zakupca/korisnika i da se nalazi u dosta lošem građevinskom stanju, a obzirom da UPTOS kao osnovnu djelatnost ima sportsku djelatnost i radi sprečavanja dalje devastacije sportskog centra, predlaže općinskom vijeću donošenje ove odluke.

Na samoj sjednici vijeća došlo se do informacije da će za četiri dana biti održana skupština Sportskog saveza Breza te da bi se prostorije mogle dodijeliti ovom savezu., te predlaže Općinskom vijeću da se odgodi usvajanje predložene Odluke, a da će vijeću biti ponuđena nova Odluka o dodjeli u zakup Sportskog centra „Partizan“, za narednu sjednicu.

Vijećnik Suljagić Mirzet potvrdio je činjenicu da će biti održana skupština Sportskog saveza Breza te da će biti imenovana upravljačka tijela.

Vijećnik Sirotanović Arif upoznaje vijećnike da je došlo do nezakonitog ulaska i primopredaje Sporskog saveza o čemu se vodio i sudski spor. Također je i pojasnio da svi članovi Sportskog saveza mogu koristiti ovaj objekat.

Predsjedavajući Općinskog vijeća predlaže da se Odluka o dodjeli u zakup Sportskog centra „Partizan“ pripremi za naredni sastanak kolegija vijeća.

Učesnika u raspravi više nije bilo pa se pristupilo glasanju za prijedlog Odluke, te je nakon glasanja konstatovano da Odluka nije usvojena i da je 19 vijećnika bilo suzdržano.

Ad.10

Razmatranje Informacije o pismu namjere za realizaciju investicionog projekta na području općine Breza.

Općinski načelnik upoznao je vijećnike da je na adresu Općine Breza stiglo pismo namjere od stane „Bosnien Investor Group Bruns“ iz Njemačke, gdje se iskazuje interesovanje za realizaciju investicionog projekta izgradnje fabrike cementa u BiH, i to na području Općine Breza, prema procjenama svih bitnih faktora i pogodnosti. Kako se u pismu navodi investicioni projekat bi podrazmijevao angažman domaćih firmi i kapaciteta u samoj realizaciji, te se planira upošljavanje oko 120 radnika u samoj fabrici cementa. Predlaže da Općinsko vijeće donese poseban zaključak i da svoju načelnu saglasnost za pristupanje aktivnosti koje će se potencijalno otvoriti mogućnosti za realizaciju pomenutog projekta uz napomenu da se planira održavanje zajedničkog sastanka predstavnicima grupe zainteresovanih investitora na kojem bi se trebala održati prezentacija projekta i svih detalja u vezi realizacije istog, na kojim se predviđa i učešće i predstavnika Općinskog vijeća.

Učesnika u raspravi više nije bilo te je nakon provedenog postupka glasanja konstatovano da je Općinsko vijeće jednoglasno sa 19 glasova za usvojilo sljedeći:

ZAKLJUČAK

I

DAJE SE PODRŠKA općinskom načelniku za vođenje pregovora sa grupom investitora iz Njemačke na realizaciji investicionog projekta izgradnje fabrike cementa, te o ishodu pregovora izvijestiti općinsko vijeće.

Ad 11.

Razrješenje i imenovanje člana Komisije za mlade i ravnopravnost spolova.

Član Komisije za izbor imenovanja i administrativne poslove Bulbulušić Nejira upoznala je vijećnike da je Komisija održala sastanak te da je jednoglasno prihvatila ostavku člana Komisije za mlade i ravnopravnost spolova Smailbegovića Aminu zbog podnešene ostavke, a da za novog člana predlaže Kulaglič Amru iz Breze.

Nakon toga vijeće je bez učesnika u raspravi sa 17 glasova ZA i 2 suzdržasna glasa razriješilo dužnosti člana komisije za Mlade i ravnopravnost spolova Smailbegović Aminu a imenovala novog člana Komisije Kulaglič Amru iz Breze.

Ad 12.

Razmatranje Informacije Komisije za praćenje i vršenje kontrole ulaganja u SRC „Ada-Breza“.

Predsjednik Komisije za praćenje i vršenje kontrole nad ulaganjem korisnika SRC „Ada! Breza „EKO KRUG“ d.o.o Breza, Bajrić Fetah upoznao je vijeće da je komisija utvrdila da su izvedeni radovi u vrijednosti od 23.185,34 KM sa PDV-om.

Dana 16.10. 2017 godine „EKO KRUG“ do.o. Breza dostavila je općinskom načelniku zahtjev za refundaciju dileja toškova sa dokumentacijom, nastalih po osnovu ulaganja u SRC ADA Breza u iznosu od 18.600.00 KM.

Pregledom fizikalnih računa koji su dostavljeni ovoj komisiji utvrđeno je da se iznos od 3.658.09 KM može priznati kao iznos koji je od strane EKO KRUG d.o.o Breza uložen u osnovnu sanaciju ARC ADA Breza, a preostali dio računa u iznosu od 8.326.80 KM se ne odnosi na radove osnovne sanacije SRC ADA ili se radi o duplikatima računa , te ih komisija nije priznala.

Služba za finansije, inspeksijske poslove i opću upravu dostavila je informaciju o ulaganjima u SRC ADA koje su izvršene iz Budžeta Općine Breza za 2017 godinu u ukupnom iznosu od 12.839,10 KM. Iznos od 6.359.05 KM može se priznati kao učešće općine Breza u osnovnu sanaciju ARC ADA. Dio iznosa koji se odnosi na novu javnu rasvjetu može se priznati u iznosu od 950 km, jer je to iznos predviđen predmjerom i predračunom radova kao Osnovna sanacija SRC ADA Breza

Komisija predlaže u cilju zaštite imovine Općine Breza i sprječavanja neovlaštenog korištenja SRC ADA u Brezi da:

- Općinsko vijeće stavi van stane Odluku o dodjeli Sportsko-rekreacionog centra ADA“ u Brezi.
- Općinski načelnik raskine Ugovor o korištenju i održavanju SRC ADA u Brezi.

Vijećnik Arif Sirotanović postavio je pitanje da li su službenici PS Breza izlazili i pravili zapisnike , na što je pojašnjeno da su na teren i intervenisali u okviru svojen nadležnosti.

Vijećnik Suljagić Mirzet istakao je da je Komisija napravila dobar posao a predložila je Općinskom vijeću i dalje mjere o kojim se Općinsko vijeće treba izjasniti,

Na osnovu vođere rasprave i prijedloga komisije predsjedavajući Općinskog vijeća predložio je sljedeći:

ZAKLJUČAK

I

Da se Odluka o dodjeli Sportsko-rekreacionog centra „Ada“ u Brezi na korištenje i održavanje stavi van snage.

II

Da Općinski načelnik raskine potpisani ugovor o dodjeli Sportsko- rekreacionog centra „ADA“ sa firmom EKO KRUG d.o.o. Breza.

Nakon provedenog postupka glasanja konstatovano je da je predloženi zaključak usvojen jednoglasno sa 19 glasova ZA , bez protiv i sudržanih glasova.

Ad. 13

Razmatranje vijećničke inicijative vijećnika Avdić Edina i zauzimanje stava po istoj, a koja se odnosi na plaćanje troškova osiguranih lica po zakonu.

Općinski pravobranilac Telalović Dženana istakla je bi bilo praktičnije da je u pismenoj formi zatraženo mišljenje općinskog pravobranioca po pitanju naplate troškova osiguranih

licima, odgovor bi bio konkretniji i precizniji, prije nego što se ova tačka našla na dnevnom redu sjednice. Zakon o zdravstvenom osiguranju iz 2010. godine član 31. reguliše pravo osiguranika na naknadu putnih troškova u vezi sa korištenjem zdravstvene zaštite. Obaveza je nadležnog organa da donese provedbene akte kako bi se osiguranicima pružila mogućnost da ostvare svoja prava utvrđena zakonom. Krajnje je neprofesionalan i nekorektan odgovor Kantonalnog zavoda zdravstvenog organa Zenica, na ranije pokretane vijećničke inicijative da se građanima Breze omogući da ostvare pravo na naplatu troškova prevoza. Općinsko pravobranilaštvo nema mandat ni ovlasti da podnosi tužbe u ime građana, da nadležna služba donese podzakonske akte.

Vijećnik Avdić Edin smatra da općinski pravobranilac treba preventivno djelovati u zaštiti državne imovine, u zaštiti interesa građana koji je višegodišnji problem i mi kao njihovi predstavnici moramo rješavati njihove probleme. Federalni organi vlasti donose zakone koje implementiraju kantonalni organi vlasti, i što oni nisu usaglašeni to nije naš problem. Kantonalni organ nema zakon o zdravstvenom osiguranju i on mora donijeti ove provedbene akte koji se od dana donošenja nikada nisu mijenjali i to je nesporno. Predlaže da Općinsko vijeće formira komisiju koja će u ime građana preko nadležnih organa pokušati riješiti problem prevoza.

Na osnovu vođene rasprave predsjedavajući Općinskog vijeća predložio je sljedeći:

ZAKLJUČAK

I

Da se imenuje komisija od strane Općinskog vijeća koja će nastaviti aktivnosti sa nadležnim organima federacije i kantona u cilju iznalaženja rješenja o plaćanju naknade za prevoz predviđen Zakonom o zdravstvenom osiguranju FBiH, („Službene novine FBiH broj :30/97“)

Predloženi zaključak usvojen je jednoglasno sa 19 glasova ZA, bez protiv i suzdržanih glasova.

Ovim je iscrpljen dnevni red dvanaeste redovne sjednice Općinskog vijeća Breza, koja je sa radom završila u 21.40 minuta.

Sastavni dio ovog zapisnika čini i tonski zapis sjednice.

ZAPISNIK SAČINILA
Zakira Smailbegović

PREDSJEDAVALA
Općinskog vijeća
Jusić Vedad